

ADMINISTRACIÓN LOCAL

MUNICIPAL

ARBO

Ordenanzas e Regulamentos

APROBACIÓN DEFINITIVA ORDENANZA MUNICIPAL REGULADORA DO ORNATO PÚBLICO, LIMPEZA VIARIA, PARQUES E XARDÍNS E OUTROS ESPAZOS PÚBLICOS

Ao non presentarse reclamacións durante o prazo de exposición ao público, queda automaticamente elevado a definitivo o acordo plenario inicial aprobatorio da Ordenanza Municipal Reguladora do Ornato Público, Limpeza Viaria, Parques e Xardíns e outros Espazos Públicos do Concello de Arbo adoptado en sesión celebrada o día 26 de xuño de 2020, cuxo texto íntegro se fai público en cumprimento do disposto nos artigos 49 e 70.2 da Lei 7/1985, de 2 de abril, Reguladora das Bases do Réxime Local, e no artigo 56 do Real Decreto Lexislativo 781/1986, de 18 de abril, polo que se aproba o Texto Refundido das disposicións legais vixentes en materia de Réxime Local:

“ORDENANZA MUNICIPAL REGULADORA DO ORNATO PÚBLICO, LIMPEZA VIARIA, PARQUES E XARDINS E OUTROS ESPAZOS PÚBLICOS DO CONCELLO DE ARBO

PREÁMBULO

A presente ordenanza municipal reguladora do ornato público e a limpeza viaria, parques e xardíns e outros espazos públicos, ten por obxecto regular, dentro da esfera das competencias municipais, o ornato público e a limpeza das vías, establecendo unhas normas xerais de actuación ao respecto, así como un sistema de infraccións e sancións para o caso de incumprimento.

Con iso, preténdese facer do municipio de Arbo un lugar máis hixiénico, máis limpo e habitable, de xeito que os veciños poidan colaborar e ser partícipes da mellora hixiénica que o aumento e crecemento continuo do Concello require.

A razón desta ordenanza é, esencialmente, orientar, informar e, no seu caso, sancionar ao cidadán, no seu desenvolvemento cotián no medio en que está inserto, no ámbito municipal, en todo o relativo á limpeza viaria, así como, a través dunha maior concienciación cidadá, colaborar para que o noso municipio permaneza limpo, evitando con iso que os custos da limpeza viaria se disparen por ter que recorrer a un aumento desorbitado dos medios.

O Concello de Arbo, non dispoñía dunha ordenanza que regulase os distintos aspectos da actividade de publicidade exterior e para tal efecto encargouse a redacción da presente norma que servirá para os fins indicados.

Así pois, o Concello de Arbo, no exercicio das potestades regulamentaria e de autoorganización, aproba a seguinte ordenanza:



*TÍTULO PRELIMINAR – DISPOSICIONES XERAIS***Artigo 1. Obxecto da presente ordenanza**

A presente ordenanza ten por obxecto a regulación, dentro do ámbito das competencias do Concello de Arbo, daquelas actividades dirixidas á limpeza das vías e espazos públicos, fomentando actitudes encamiñadas á eliminación da sucidade e ao mantemento do ornato público e da limpeza en todo o termo municipal.

Prevé ademais a protección dos bens de titularidade municipal e de todas as instalacións e elementos que forman parte do patrimonio do Concello.

Regular as condicións ás que terán que someterse as instalacións e actividades de publicidade exterior, calquera que sexa o sistema utilizado para a transmisión da mensaxe publicitaria, coa finalidade de compatibilizar a actividade publicitaria coa protección e a mellora da paisaxe urbana e da imaxe do Concello de Arbo.

Todos os veciños deben cumprir as prescricións contidas na presente ordenanza e nas normas complementarias que no seu caso se diten.

Artigo 2. Fundamento

1.— A regulación da presente ordenanza atínxese aos principios do artigo 45 da Constitución española; arts. 25 e 26 da Lei 7/85, de 2 de abril, reguladora das bases do réxime local, respecto da obriga de velar por un medio axeitado para o desenvolvemento da persoa, e de prestar os servizos de limpeza viaria.

2.— Art. 4.1. a) da Lei 7/85, de 2 de abril, reguladora das bases do réxime local; art. 6.1. a) da Lei 5/97, de 22 de xullo, de administración local de Galicia; e art. 4.1. a) do Real decreto 2568/86, de 28 de novembro, respecto das potestades regulamentaria e de autoorganización.

3.— Art. 4.1. f) da Lei 7/85, de 2 de abril, reguladora das bases do réxime local, e Título XI introducido pola Lei 57/2003, de 16 de decembro, de medidas para a modernización do goberno local, sendo de aplicación supletoria, para a súa substanciación, o procedemento previsto nas Leis 39/2015, de 1 de outubro, de procedemento administrativo común das administracións públicas, e principios recollidos na Lei 40/2015, de 1 de outubro, de réxime xurídico do sector público.

4.— Lexislación sectorial. Lei 1/1995, de 2 de xaneiro, de protección ambiental de Galicia. Lei 10/2008, de 3 de novembro, de residuos de Galicia. Lei 22/2011, de 28 de xullo, de residuos e solos contaminados.

Artigo 3. Ámbito obxectivo da presente ordenanza

1.— Para os efectos da presente ordenanza, enténdese por vía pública os paseos, rúas, avenidas, prazas, beirarrúas, xardíns, zonas verdes e demais bens de propiedade municipal destinados directamente ao uso común xeral dos veciños, quedando, por tanto, excluídas as urbanizacións privadas, xardíns particulares, pasaxes pechadas, patios interiores, solares privados, accesos a garaxes, galerías comerciais e similares, nos que a limpeza é responsabilidade dos particulares, sexa en propiedade única, compartida ou en réxime de propiedade horizontal.



O Concello de Arbo exercerá o control da limpeza destes elementos, e poderá obrigar no seu defecto ás persoas responsables, independentemente das sancións a que dera lugar a súa actuación.

2.— Así mesmo, quedan excluídos do ámbito desta ordenanza os terreos ou bens que, aínda sendo de propiedade municipal, estean sometidos a un uso común especial ou a un uso privativo por particulares, entidades públicas ou privadas ou outras administracións públicas, logo das correspondentes licenzas e concesións, respectivamente.

Artigo 4. Definicións

Para os efectos da presente ordenanza, entenderanse:

1. Por rótulos, os anuncios fixos ou móbiles realizados mediante pintura, ou calquera outro material destinados a conferir-lles unha longa duración.
2. Por carteis, os anuncios (impresos, pintados ou escritos) sobre papel ou outro material de escasa consistencia. Se son de formato reducido e distribución manual, os carteis terán a consideración de panfletos.
3. Por pancartas, os anuncios publicitarios de gran tamaño, situados na vía pública sobre un soporte non ríxido.
4. Por pintadas, as inscricións realizadas na vía pública, sobre os muros ou paredes dos edificios, ou sobre calquera dos elementos estruturais ou do mobiliario urbano.
5. Por bandeirolas, os anuncios publicitarios de escaso tamaño e que, como colgantes, adoitan dispoñerse suxeitos a un elemento común que na maioría dos casos se apoia en partes de edificios ou mobiliario urbano.
6. Por adhesivos, os impresos dotados de material adhesivo nunha das súas caras, que poidan aplicarse directamente en calquera outro elemento.
7. Por panfletos e folletos, os fragmentos de papel ou de material análogo que se distribúen aos cidadáns ou se depositan na vía pública, vehículos, buzóns exteriores etc.

TÍTULO I – LIMPEZA DE ESPAZOS PÚBLICOS

Artigo 5. Limpeza da rede viaria pública

A limpeza da rede viaria pública, tanto de tránsito rodado como peonil, será realizada polos servizos municipais a través das formas de xestión que acorde o Concello de Arbo conforme a lexislación en vigor.

Artigo 6. Zonas privadas

A limpeza das rúas, espazos e terreos de dominio particular levarase a cabo polos seus donos, seguindo as directrices que marque o Concello para acadar niveis adecuados de hixiene.



As comunidades de propietarios ou quen habite o inmovible ou inmoables lindeiros están obrigados a manter limpos os patios de luces, patios de quinteiro ou calquera espazo sen edificar anexos ao edificio, sexan comúns ou propios, rexéndose para o efecto polas súas normas estatutarias e, no seu defecto, pola directrices do Concello, non podendo en ningún dos casos contradicir a presente ordenanza.

Artigo 7. Solares e terreos privados

A limpeza de solares e outros terreos de propiedade particular que se atopen en solo urbano e non estean incluídos no artigo anterior corresponderá, igualmente, á propiedade.

O cumprimento da obriga de manter limpos os terreos non exime de levar a cabo o seu valado ou peche, conforme coa normativa urbanística e demais disposicións sobre réxime do solo.

En canto a limpeza e xestión de biomasa nos terreos de natureza rústica resultarán de aplicación as previsións contidas na normativa de defensa e prevención dos incendios forestais.

Artigo 8. Depósito de residuos domiciliarios

Os residuos incluídos na recollida de lixo domiciliaria, depositaranse en envases non retornables e resistentes, separando adecuadamente a materia orgánica da inorgánica, depositando cada unha no colector correspondente.

Cartón, papel e vidro depositaranse nos colectores dispostos para o efecto. No caso de cartóns, embalaxes e caixas depositaranse convenientemente pregados.

Queda prohibido o depósito de residuos na vía pública ou o carón do colector.

Artigo 9. Prohibicións en vías, parques, xardíns e outros espazos públicos

Queda prohibida calquera operación que poida ensuciar as vías e espazos libres públicos, e, en especial:

1. Lavar ou limpar vehículos, así como cambiarlles o aceite ou outros líquidos.
2. Manipular ou dispersar residuos ou alterar os seus envases.
3. Tirar á vía pública calquera clase de refugалlos dende vehículos, xa estean parados ou en marcha.
4. Tirar fóra das papeleiras os residuos de tamaño pequeno, como papel, envoltorios ou similares, ou ben baleirar o contido das papeleiras na vía pública.
5. Tirar materiais acendidos en papeleiras, colectores ou outra clase de mobiliario urbano destinado á recollida de residuos, que, en todo caso, deberán depositarse unha vez apagados.
6. Tirar dende balcóns e terrazas calquera clase de residuos, restos de arranxo de macetas ou outro obxecto que puidera causar danos ou molestias a persoas ou cousas.



7. Verter auga sucia sobre a vía pública, solares ou zonas axardinadas, así como o desaugadoiro de aparatos de refrixeración sobre eles.
8. Abandonar na vía pública os produtos de varrido e limpeza dela, producidos polos particulares.
9. Ensuciar a vía pública como consecuencia da tenencia de animais.
10. Regar as plantas instaladas no exterior dos edificios se a consecuencia desta operación se producen vertidos ou salpicaduras sobre a vía pública ou sobre os seus elementos.
11. Abandonar mobles e tarecos particulares na vía pública, agás os que estean en espera de ser retirados polo servizo especial de recollida deles.
12. Realizar grafite, pintadas, manchas, garabatos, escritos, inscrición con calquera material (tinta, pintura, materia orgánica ou similares), ou ben raiando a superficie, sobre calquera elemento do espazo publico, así como no interior e exterior de equipamentos, infraestruturas ou elementos dun servizo publico e instalacións en xeral, incluídos rúas, equipamentos, mobiliario e árbores, xardíns e vías publicas en xeral.
13. Camiñar por parterres ou zonas axardinadas.
14. Cortar flores, ramas ou especies vexetais.
15. Efectuar calquera manipulación sobre as árbores e plantas sitas nos espazos públicos. Incluído o movemento das xardineiras.
16. Arrojar lixo en espazos axardinados, incluída as xardineiras.
17. Mover ou cambiar de lugar o mobiliario das Rúas e, especialmente, da Praza Consistorio.

Artigo 10. Titulares de establecementos

1.— Quen estea ao fronte de quioscos ou postos autorizados na vía pública están obrigados a manter limpo o espazo no que desenvolven o seu cometido e as súas proximidades durante o horario en que realicen a súa actividade, e deixalo no mesmo estado unha vez finalizada.

2.— A mesma obriga incumbe aos donos de cafés, bares e establecementos análogos en canto á superficie que ocupen con veladores, mesas, cadeiras, etc..., así como da beirarrúa correspondente á lonxitude da súa fachada. Todo o mobiliario empregado deberá ser retirado da vía pública unha vez expirado o prazo da correspondente licenza municipal.

3.— Os titulares dos establecementos, quioscos ou postos, deberán instalar e manter pola súa conta as papeleiras necesarias. A recollida dos residuos acumulados nelas realizárase polo titular do establecemento.

Artigo 11. Vehículos de transporte

Os propietarios ou condutores de vehículos que transporten terras, entullos, materiais pulverulentos, áridos, formigón, cartóns, papeis ou materiais similares, terán que tomar cantas medidas sexan precisas para cubrir tales materiais durante o transporte e evitar que pola súa natureza ou pola velocidade do vehículo ou do vento caian sobre a vía pública os materiais transportados. Así mesmo, antes de saír das obras, graveiras, etc., terán que lavarse os baixos e



rodas dos vehículos para impedir que ensucien as vías públicas, mediante calquera sistema de lavado, podendo os servizos técnicos municipais esixir o uso doutro sistema que se considere máis efectivo.

Os vehículos destinados aos traballos de construción, darán cumprimento ás prescricións que se establecen sobre transporte e vertido de terras e entullos.

Queda prohibido o transporte de formigón con vehículo formigoneira sen levar pechada a boca de descarga cun dispositivo que impida o vertido de formigón na vía pública. Prohíbese limpar as formigoneiras na vía pública.

Artigo 12. Carga e descarga de vehículos

Finalizadas as operacións de carga descarga, saída ou entrada a obras, almacéns, etc., de calquera vehículo que poida producir sucidade na vía pública, o persoal responsable das citadas operacións, e subsidiariamente, os titulares dos establecementos e obras onde se efectuaran e, en último termo, o propietario ou o condutor do vehículo, limparán a vía pública e os elementos desta que se tiveran ensuciado, así como retirarán os materiais vertidos.

As persoas mencionadas no apartado anterior, e pola mesma orde, serán as responsables das infraccións e dos danos que delas se deriven.

Artigo 13. Obras na vía pública

Cando se realicen pequenas obras na vía pública, os materiais sobrantes e entullos terán que ser retirados dentro das vinte e catro horas seguintes á terminación dos traballos, deixándoos entre tanto debidamente amoreados para non perturbar a circulación de persoas e vehículos.

Cando pola entidade das obras, estas requiran da utilización de colectores para almacenaxe de entullos, a vía pública estará libre destes elementos durante os fins de semana e festivos, para o que os colectores e provisións de material deberán retirarse antes das 19:00 horas do venres ou do día anterior ao festivo correspondente, e, en todo caso, dentro das vinte e catro horas seguintes á finalización dos traballos.

En todo caso a vía pública deberá quedar libre de toda maquinaria utilizada para a realización das citadas obras, respectándose o horario prescrito anteriormente.

Superado o termo de vinte e catro horas, previa a instrución do correspondente expediente, os materiais abandonados na vía pública adquirirán o carácter de propiedade municipal, sen que o responsable poida reclamar ao Concello polas perdas ocasionadas na eliminación destes materiais, e sen prexuízo da taxa fiscal a aplicar pola prestación do correspondente servizo, nin das sancións que sexan aplicables.

Cando se trate de obras na vía pública, independentemente das medidas de seguridade viaria, deberán instalarse valos debidamente sinalizados nos que se reflectirá o nome da empresa contratista e/ou promotora, así como elementos de protección da obra e tubos para a carga e descarga de materiais e produtos de derriba, que deberán reunir as condicións necesarias para impedir a sucidade na vía pública e que se causen danos a persoas ou cousas.



Cando se trate de edificios en construción, rehabilitación, reforma ou derribo, será o contratista da obra o responsable da limpeza da vía pública, así como da limpeza de camiños e rúas en todo o percorrido polo termo municipal, que efectúen os vehículos adscritos á obra.

Artigo 14. Animais domésticos

Os cans que circulen por vías públicas deberán ir acompañados e conducidos mediante correa, cadea ou cordón. Os cans potencialmente perigosos e os cruces de primeira xeración deberán circular ademais provistos do correspondente bozal.

As persoas que conduzan cans u outros animais polas vías e espazos públicos deben impedir que estes ensucien en calquera lugar destinado ao tránsito de peóns. No caso de que as deposicións dos animais se realicen na vía pública, a persoa que conduza o animal está obrigada á súa retirada, limpeza e depósito en colectores de materias orgánicas.

Os propietarios son directamente responsables dos danos ou afeccións a persoas ou cousas e de calquera acción que ocasione a sucidade nas zonas públicas, producida por animais da súa pertenza.

En ausencia do propietario, será responsable subsidiario a persoa que conduce o animal no momento de producirse a acción infractora

TÍTULO II – ORNATO PÚBLICO DE EDIFICACIONES

Artigo 15. Partes visibles

Os propietarios das fincas, vivendas e establecementos ou subsidiariamente, os titulares, están obrigados a mantelas nas debidas condicións de seguridade, limpeza e ornato público.

As comunidades de propietarios dos edificios ou os propietarios de fincas, vivendas e establecementos están obrigados a manter limpas e en bo estado as fachadas, os rótulos de numeración dos portais, as medianeiras descubertas, as entradas, as escaleiras de acceso e, en xeral, todas as partes dos inmobles que sexan visibles dende a vía pública.

Os propietarios (particulares ou promotores e construtores) dos baixos deberán pechalos debidamente, con ladrillo ou bloque, levando a cabo o seu recebado, salpicado e en todo caso pintado.

Para estes efectos, os propietarios deberán proceder aos traballos de mantemento, limpeza, recebado e estucado, cando por motivos de ornato público sexa necesario ou o ordene a autoridade municipal, logo do informe dos servizos municipais competentes.

No caso de incumprimento dos apartados anteriores, e logo do trámite de audiencia, o Concello requirirá aos responsables para que no prazo que se lles sinale realicen as obras u operacións necesarias.



Artigo 16. Precaucións

Cando se realicen limpeza de escaparates, portas, toldos, etc., adoptaranse precaucións para non causar molestias aos transeúntes nin ensuciar a vía pública. Si se ensuciase por tal motivo, os donos do inmovible limparán os residuos.

Iguais precaucións terán que adoptarse para a limpeza de balcóns e terrazas, así como para o rego de plantas instaladas neles.

Artigo 17. Prohibicións

Co obxecto de manter as condicións de limpeza que esixen o ornato e a estética do municipio, queda prohibido:

- a) Realizar inscricións ou pintadas nas paredes, muros, cabinas, fachadas, valos, así como no mobiliario urbano.
- b) Colocar carteis en lugares non autorizados expresamente para iso.
- c) Riscar, ensuciar ou arrancar os carteis ou anuncios situados nos lugares autorizados para o efecto.

Artigo 18. Condicións de ornato público das fachadas

1.— As fachadas o espazos visibles dende a vía pública das edificacións deberán manterse axeitadas e en boas condicións, mediante a limpeza, pintura, reparación ou reposición dos seus materiais de revestimento.

2.— O deber de conservación das fachadas ou espazos visibles dende a vía pública das edificacións nas adecuadas condicións de ornato público reguladas nesta Ordenanza esténdese a calquera dos seguintes elementos arquitectónicos:

- a) Fachadas exteriores e interiores e medianeiras visibles dende a vía pública.
- b) Cornixas, aleiros, remates, marquesiñas.
- c) Baixantes, caleiros e gárgolas.
- d) Balcóns e reixas.
- e) Instalacións exteriores (antenas, aire acondicionado, tendidos por fachada, etc.).
- f) Valados e patios comunais visibles.
- g) Cubertas e tellados.
- h) Carpintería exterior e toldos.
- i) Cor das pinturas, materiais e outros adornos das fachadas exteriores e interiores e medianeiras visibles dende a vía pública.
- j) Outros elementos puntuais de interese arquitectónico que dan valor singular ás edificacións como pináculos, molduras, rosetóns, relevos, pilastras, forxa e reixas, esgrafiados, recercados, escudos, cantería, traballos de ebanistería, filigranas de ladrillo, etc.



3.— Con carácter xeral establécense as seguintes prescricións:

- a) Prohíbese a situación de tendeiros na fachada principal, a non ser que se coloquen en ocos dispostos a tal fin, protexidos por mamparas ou celosías acordes co entorno.
- b) Prohíbese a colocación de aparatos de aire acondicionado en fachada principal, se o edificio non dispón de outro sitio para a súa colocación deberá empregarse o sistema de protección contemplado no apartado anterior, que en todo caso, deberá cumprir a normativa técnica de aplicación.
- c) Prohíbese a colocación de antenas en fachadas ou espazos visibles dende a vía pública.

Neste punto deberá proceder a axustarse o estipulado no P.X.O.M e na Lei do Solo de Galicia

TÍTULO III – LIMPEZA E MANTEMENTO DE URBANIZACIÓNS E FINCAS DE PROPIEDAD PRIVADA

Artigo 19. Obrigas

Corresponde aos propietarios a limpeza das beirarrúas, paisaxes, calzadas, prazas, etc., das urbanizacións de dominio e uso privado. Será tamén obriga dos propietarios a limpeza dos patios interiores de quinteiro, as fincas particulares, as galerías comerciais e similares.

Dende as fincas particulares, non pode sobresaír á vía pública ningunha clase de vexetación ou maleza.

O Concello exercerá o control e inspección do estado de limpeza dos elementos obxecto dos apartados anteriores, e poderá requirir aos responsables para a súa limpeza, de acordo coas instrucións que para o efecto diten os servizos municipais.

Os propietarios de fincas deberán mantelas libres de refugалlos e residuos, e nas debidas condicións de salubridade, hixiene, seguridade e ornato público. A prescrición anterior inclúe a existencia da súa desratización e desinfección.

Os solares sen edificar valaranse convenientemente co recuamento e alturas que marque o Plan xeral de ordenación municipal, co fin de manter as condicións adecuadas de seguridade e salubridade.

TÍTULO IV – NORMAS ESPECIAIS

Artigo 20. Carteis e anuncios

20.1. Establecementos

Os propietarios ou titulares de inmobles coidarán de manter limpas as paredes ou fachadas de calquera tipo de anuncio que non sexa o específico dunha profesión ou actividade mercantil.

A colocación de carteis, rótulos de establecementos ou anuncios realizarase na forma que se estableza na autorización ou licenza municipal que se outorgue ao respecto.



A colocación de carteis, rótulos de establecementos ou anuncios deberán reunir as seguintes condicións de ornato público:

- a) Os materiais empregados deberán ser bronce, latón, cobre, aceiro inoxidable, ferro, ferro pintado, aluminio lacado, madeira, alabastro, granitos, mármore, pedras naturais e artificiais, xeso endurecido, formigón tratado, vidro, cerámica tradicional.
- b) As dimensións serán as que, pola súa composición, permitan as proporcións dos espazos nos que se sitúen, sen que poidan superporse a elementos compositivos ou decorativos da fachada.
- c) Autorízase o voo dos rótulos pegados ó paramento, sempre que non se supere un saínte superior a 0'10 metros respecto do paramento.
- d) Autorízase o voo dos focos para a iluminación dos rótulos, sempre que non se supere un saínte superior a 0'40 metros respecto do paramento e se sitúen a unha altura mínima de 3'50 metros respecto da beirarrúa.
- e) Poderán colocarse na planta baixa de edificios, con carácter xeral; en planta primeira, se se sitúan nos entrepanos dos ocos; e en calquera outra planta, cando a totalidade do edificio teña un único uso.
- f) Prohíbese a súa colocación en e sobre a coroación de edificios e en balcóns, varandas e antepeitos.

20.2. Publicidade en Período Electoral

Todo o que se refira a publicidade electoral dos comicios legalmente convocados, o concello limitárase a informar á Xunta Electoral de Zona dos espazos dispoñibles para cartelería e bandeirolas.

A concesión da autorización municipal para os elementos publicitarios aquí definidos, levará implícita a obriga polo solicitante de limpar os espazos da vía pública que se tiveran ensuciado, e de retirar dentro do prazo establecido, todos os elementos publicitarios que se tivesen utilizado e os seus correspondentes accesorios.

Queda totalmente prohibida a publicidade electoral incontrolada a base de carteis, pegatinas, etiquetas, panfletos, etc... que queden pegados directamente sobre parámetros de edificios, monumentos, árbores, obras e vías públicas e elementos de mobiliario urbano.

Terminado o período electoral, os partidos políticos deberán retirar os elementos publicitarios subsistentes. En caso de non facelo no prazo de 10 días, previo oportuno requirimento o farán os servizos municipais correspondentes a costa do partido político anunciante.

20.3. Festas Populares e Tradicionais

A alcaldía poderá adoptar as disposicións especiais que considere oportunas para regular a publicidade durante as festas populares, de tal maneira que cause os menores inconvenientes aos intereses dos cidadáns.

En calquera caso queda prohibido a utilización de publicidade nos lugares enumerados nesta ordenanza no artigo 20.4.



As pancartas e bandeirolas deberán ser retiradas pola entidade anunciadora (empresa, comisión de festas, partido político, etc.) no prazo máximo de cinco días dende que finalizase o prazo para o que foron colocadas (periodo electoral, data da festa, etc.).

De non facelo nun período de 10 días dende a realización do evento, serán retiradas polos servizos municipais, imputándose aos responsables os custos correspondentes ao servizo prestado, sen prexuízo da imposición das sancións a que houbese lugar.

A colocación de carteis, pancartas, bandeirolas, panfletos, e calquera outra actividade publicitaria das reguladas no presente título, esta suxeita á comunicación previa ao concello.

20.4. Prohibicións Expresas

Prohíbese a colocación de carteis, bandeirolas, rótulos, adhesivos, así como calquera outro elemento publicitario ou de comunicación:

- a) Fachadas dos edificios públicos
- b) No mobiliario ou equipamento urbanos (farois, bancos, marquesiñas).
- c) Colectores de lixo
- d) Nas sinais identificativas ou de turismo situadas nas estradas
- e) Nas rotondas do termino municipal do Concello de Arbo
- f) Nos edificios cualificados como histórico-artísticos, ou asimilados.
- g) En árbores, xardineiras ou calquera outro material urbano situado en Parques e Xardíns
- h) Colocación de pancartas e bandeirolas suxeitas ás árbores en calquera dos seus elementos.
- i) En varandas ou muros municipais

Artigo 21. Pintadas

Prohíbese toda clase de pintadas na vía pública, tanto sobre os seus elementos estruturais, calzadas, beirarrúas e mobiliario urbano, como sobre os muros, paredes, estatuas, monumentos e calquera elemento externo.

Artigo 22. Distribución de panfletos ou similares

Prohíbese espaxear e tirar sobre a vía pública toda clase de panfletos ou materiais similares, así como a súa colocación en parabrisas de vehículos ou calquera outro soporte similar.

Nas novas promocións de vivendas, os buzóns para publicidade situados na parte exterior dos portais contarán cun mecanismo que impida a súa saída de dito buzón e caída ou depósito na vía pública.

Os servizos municipais correspondentes limparán os espazos públicos que se tiveran visto afectados pola distribución ou dispersión de panfletos ou folletos, imputando aos responsables o custo dos servizos extraordinarios prestados, sen prexuízo da imposición das sancións que correspondan.



Artigo 23. Terras e entullos

1.— Prohíbese depositar na vía pública toda clase de entullos ou refugallos procedentes de obras de construción e remodelación de inmobles, ou de obras realizadas no seu interior.

2.— Igualmente, queda prohibido almacenar na vía pública, fóra dos límites dos valos protectores de obras, o material de construción.

3.— Os residuos e materiais a que se refire o presente artigo só poderán ser almacenados na vía pública utilizando colectores adecuados ao cumprimento da normativa aplicable, e na forma e condicións autorizadas polo Concello.

4.— Os colectores para obras serán retirados da vía pública:

4.1. Ao expirar o termo da concesión da licenza de obras.

4.2. Cando existan razóns de interese público logo do requirimento da autoridade municipal.

4.3. En canto estean cheos, para o seu baleirado e sempre dentro do mesmo día en que se producira o seu enchido.

4.4. Durante os fins de semana e festivos, para o que os colectores e provisións de material deberán retirarse antes das 19:00 horas do venres ou do día anterior ao festivo correspondente, e, en todo caso, dentro das vinte e catro horas seguintes á finalización dos traballos.

4.5. Unha vez finalizada a xornada laboral, cubrirase para impedir o esporexamento de materiais.

Artigo 24. Mobles e pertenzas

Queda prohibido o abandono en espazos públicos de mobles, electrodomésticos e demais pertenzas. As persoas que desexan desprenderse de tales elementos comunicaranos ao Concello, que lles orientará sobre o procedemento a seguir para a súa eliminación.

*TÍTULO V – RESPONSABILIDADES, INFRACCIÓNS E SANCIÓN***Artigo 25. Responsabilidades**

1.— As responsabilidades derivadas do incumprimento das obrigas sinaladas nesta ordenanza serán esixibles non só polos actos propios, senón tamén polos daquelas persoas e animais polos que se deba responder nos termos previstos no Código Civil.

2.— Cando se trate de obrigas colectivas como uso, conservación e limpeza de zonas comúns, etc..., a responsabilidade será atribuída á respectiva comunidade de propietarios ou habitantes do inmovible cando non estea constituída.

3.— Cando se causen danos a terceiros como consecuencia da actuación das entidades que, no seu caso, realicen a xestión indirecta do servizo, estarase ao establecido na lexislación de contratos das administracións públicas e pregos de cláusulas administrativas e prescricións técnicas que rexan o expediente de contratación.



Artigo 26. Responsabilidade municipal

O Concello responderá directamente dos danos e prexuízos causados aos particulares nos seus bens e dereitos como consecuencia do funcionamento dos servizos públicos ou da actuación das súas autoridades, funcionarios ou axentes, nos termos establecidos na lexislación xeral sobre responsabilidade administrativa.

Artigo 27. Tipificación das infraccións

As infraccións á presente ordenanza clasifícanse en leves, graves e moi graves:

a) Considéranse infraccións leves as seguintes:

1. Incumprimento das normas sobre limpeza da vía pública como consecuencia do uso común xeral dos cidadáns.
2. Ensuciar a vía pública como consecuencia da tenencia de animais ou por tirar outros pequenos residuos, tales como gomas de mascar, restos de froitos secos, cabichas, papeis, envoltorios, etc.
3. Ensuciar a vía pública como consecuencia do consumo de bebidas alcohólicas ou refrescantes, tanto en envases de cristal como de plástico, metal ou similares.
4. Librar residuos fóra dos colectores ou en elementos de contención distintos dos permitidos.
5. Depositar residuos en horas ou lugares distintos sinalados polos servizos municipais, ou en colectores que non se correspondan co residuo depositado.
6. Incumprimento da obriga de limpeza en pasaxes e urbanizacións particulares.
7. Colocar carteis fóra de lugares habilitados polo concello, lixar a vía pública con publicidade e a non retirada de pancartas ou bandeirolas no prazo previsto de 10 días despois da súa caducidade (remate da festa, data das eleccións, etc).

b) Considéranse infraccións graves as seguintes:

1. Ensuciar a vía pública a consecuencia de efectuar obras e outras actividades que esixan limpeza segundo esta ordenanza.
2. Incumprimento da obriga de mantemento de limpeza de fachadas, rótulos anunciante, toldos, medianeiras, entradas, escaleiras de acceso e, en xeral, todas as partes dos inmobles que sexan visibles dende a vía pública.
3. Incumprimento do deber de limpeza e mantemento de solares.
4. Ensuciar a vía pública a consecuencia de actividades en establecementos comerciais, hostaleiros, quioscos, postos na rúa e similares.
5. Abandonar mobles, pertenzas domésticas, materiais residuais ou outros obxectos similares en fincas, camiños ou calquera outro lugar non habilitado especialmente para iso.



6. Librar na vía pública residuos excluídos dos servizos de recollida domiciliaria, e por tanto susceptibles dun especial tratamento e depósito, sempre que este feito non sexa clasificado como moi grave no apartado seguinte.
 7. Incumprimento das normas desta ordenanza sobre actos públicos, pancartas, carteis, rótulos, pintadas e panfletos.
 8. Non manter os elementos de contención retornables en perfectas condicións de uso e limpeza.
 9. Efectuar manipulación de lixo na vía pública.
 10. Liberar envases e residuos de envases en colectores comúns ou na vía pública.
 11. A reiteración de 2 faltas leves no período de dous anos.
- c) Considéranse infraccións moi graves as seguintes, ao supoñer unha perturbación relevante na convivencia, e un grave e relevante deterioro dos equipamentos, infraestruturas, instalacións e espazos públicos:
1. Ensuciar a vía pública con motivo do transporte de materiais de obra, terras, entullos ou residuos especiais, ao non ter adoptado medidas no vehículo para impedir os vertidos.
 2. Efectuar vertidos de terras e entullos en lugares non autorizados.
 3. Depositar na vía pública animais mortos ou residuos de carácter especial (perigosos, sanitarios, etc...)
 4. Librar desperdicios, xurro, esterco, e produtos similares que producen mal olor en fincas urbanas, ou camiños.
 5. Realizar actos vandálicos, pintadas ou pegar elementos publicitarios no mobiliario urbano (colectores, papeleiras, marquesiñas, etc...)
 6. A reiteración de 3 faltas graves no período de dous anos.

Artigo 28. Sancións

As sancións que se poderán impoñer pola comisión das infraccións indicadas, serán:

1. Para as que teñan a consideración de leves, imporase unha multa de hasta 200 euros.
2. Para as infraccións que teñan a consideración de graves, imporase unha multa de 201 a 400 euros.
3. Para as infraccións que teñan a consideración de moi graves, imporase unha multa de 401 a 800 euros.
4. Na gradación da sanción considerase especialmente os seguintes criterios:
 - a) O grado de culpabilidade ou a existencia de intencionalidade.
 - b) A continuidade ou persistencia na conduta infractora.
 - c) A natureza dos prexuízos causados.,



- d) A reincidencia, por comisión no termo dun ano de máis dunha infracción da mesma natureza cando así se teña declarado por resolución firme en vía administrativa.
5. No caso de reincidencia na infracción da obriga establecida no artigo 10 desta ordenanza, poderase impoñer tamén a sanción de retirada temporal da licenza ou autorización municipal para o funcionamento do establecemento de que se trate, ata un máximo dun ano.

Todo isto sen prexuízo de esixirlles aos responsables da infracción, se fose o caso, que realicen os traballos de eliminación do lixo ou sucidade xerada e que indemnicen os danos causados.

Artigo 29. Procedemento sancionador

Para a imposición das sancións que puideran derivarse desta ordenanza, estarase ao procedemento establecido na Lei 9/2015, de 1 de outubro, de procedemento administrativo común das administracións públicas e principios recollidos na Lei 40/2015, de 1 de outubro, de réxime xurídico do sector público.

Artigo 30. Prescrición

Segundo o establecido no artigo 30 da Lei 40/2015, de 1 de outubro, de réxime xurídico do sector público, as infraccións leves prescribirán aos seis meses, as graves aos dous anos e as moi graves aos tres anos

Artigo 31. Concorrencia na esixencia de responsabilidades

As sancións que poidan impoñerse en cumprimento do disposto nos artigos anteriores, serán independentes das que poidan proceder como consecuencia da vulneración das disposicións sectoriais aplicables en materia urbanística, medioambiental, etc..., das indemnizacións de danos e prexuízos a prol de terceiros que procedesen, ou das accións de diferente natureza que a Corporación poida exercer ao respecto.

As responsabilidades e sancións mencionadas tramitaranse e executaranse, no seu caso, por vía executiva.

DISPOSICIÓNS FINAIS

Primeira.— No non previsto na presente ordenanza, estarase ao disposto no Título XI da Lei 7/85, de 2 de abril, reguladora das bases do réxime local, na Lei 39/2015, de 1 de outubro, de procedemento administrativo común e das administracións públicas e Lei 40/2015, de 1 de outubro, de réxime xurídico do sector público, sen prexuízo da aplicación da lexislación sectorial na materia.

Segunda.— En aplicación da presente ordenanza, os actos e acordos municipais que poñan fin á vía administrativa poderán, logo do recurso de reposición, ser impugnados ante a xurisdición contencioso-administrativa, sen prexuízo do posible exercicio doutras accións que procedan ante a xurisdición competente.



Luns, 5 de outubro de 2020

Núm. 192

Terceira.— A presente ordenanza entrará en vigor unha vez se teña publicado integramente o seu texto no Boletín Oficial da Provincia e teña transcorrido o prazo previsto no art. 65.2 da Lei 7/85 de 2 de abril, reguladora das bases do réxime local.

Contra a presente ordenanza poderá interpoñerse directamente recurso contencioso – administrativo ante o órgano de tal xurisdición e no prazo que establece a Lei 29/1998, de 13 de xullo, reguladora da xurisdición contencioso–administrativa.”

O Alcalde – Horacio Gil Expósito

Documento asinado dixitalmente

Pode verificar a integridade deste documento no seguinte enderezo:
<https://sede.depo.gal>
Código seguro de verificación:ARRHZ2472DVNC1UD

